

游齋詩詞集

七言古詩一首

安平古意

君不見皇天氣指海仙館，古堞何處黃雲滿？君不見瑟颯悲兮秋茂園，處所荒涼秋草繁。萬派奔濤走東海，四時景物風煙改；古人飲酒酣馳暉，飛鴻雪泥豈長在！且看當年延平王，拭練金甲生輝光；千里旌旗翻雪浪，戰艦森森誇雄強。彭澤小隱恐遲暮，哀鴻酸嘶客能賦；羲和快鞭辭漢月，楊花吹盡關城路。關城路、掣鯨騎，市人爭勢亦足奇；回首經幾時，繁華埽地復無遺。五夜壯心愁風雨，賢哲栖栖享茅土；鄰家白叟今尙哉？欲問興亡不能語。

五言律詩二首

讀書小憩

履滑青苔濕，寒凝篠徑深。登高臨廣野，暫歇覓鳴禽。所愛唯山水，相親有素琴。霑衣空宇寂，誰會此幽心？

芝柏書齋

何事銷暇日，琴書獨閉關。鳴蛩怯寒露，落葉瘦秋山。夫子吟清調，生徒洗素顏。傳燈空想望，倦鳥未知還。

七言律詩八首

晚步關渡二首

午雷關渡漲新痕，苔院人家半掩門。流水蒼嵐浮遠影，黯塵街柳逗黃昏。窗前搖蔭偏疑夜，地僻初鐙更似村。喚起劉郎八司馬，非關秋緒與離魂。

晚市喧囂損夕陽，庭槐落葉總堪傷。船移左岸聽雲濕，峯吐圓盤映草涼。回景依然空剩水，舊游無處哭興王。關心應是登臨地，不見劉琨意氣昂。

偕游平溪二首

霧盡嶒巒一逕初，火車纔過籟聲徐。坐聽巖響收幽谷，吹注花肥接隱廬。久立欲呼山鬼語，苦吟都索去年書。回歸鐵道緣三里，暫擁谿光未卜居。

晚色微涼去住心，都城捷運已駸駸。苔經瀑布崖堪護，路轉谿山意共深。月久侵藤留小飲，蟲嫌受露發初吟。盤桓幾度幽棲客，靜次風前約好音。

夜過石門二首

海上機輪意縱橫，壓流回斗作潮聲。羣峰纔落光搖月，老境喧呶蟻論兵。薄雨吹堤終曼衍，坐鄰蝕窟獨悲鳴。憑欄息駕初三夜，不盡蒼茫百感生。

半鎖螢屏海氣浮，塔鐙相對已悠悠。百年形勝今誰在？幾宿星河歲欲流。攝影常圓珠夜月，聽濤仍卷石門秋。昨宵卻際洄瀾夢，可是無心攬轡游。

臨故宮外雙溪二首

臨風冉冉逐年芳，過舍微聞淡飯香。宿鳥沾泥馱殘夢，斷塍蔓草隔垂墻。偶緣映水山相識，似怯牽衣話未央。臺北年年下城路，落霞滿背自成鄉。

故宮雙闕鎖青苔，劫燼殘英幾度開。娟影尙留香桂子，朗風豈負菊花杯？鐫痕喬木春猶在，傑閣星光夕宛催。慣譜秋蟲離索後，忍令迢悵換成灰。

五言絕句一首

遊五指山

橫塘委黃葉，古寺度微鐘。杳杳無人問，蒼茫煙雨中。

七言絕句二首

有感 效黃仲則（禹城）詩。

竹塹茫茫代幾更，闌風伏雨又聲聲。九州故道都磨滅，何事人心總不平？

臺南見漁江圖作

淮邊落葉蕭蕭雨，垂釣烟波一棹輕。漁父歸來村郭晚，江樓雁冷帶離聲。

詞一闕

翠樓吟 吳梅〈翠樓吟〉撫時感事之作也，於故國之思，情不能已。予讀之鬱臺，遂作。

數杵秋沉，危峰月罅，啼痕故園無寐。鯤身淪小劫，正回首烽雲兵氣。珠崖凝睇，又被髮纓冠，東風鉛淚。形骸寄，冷灰深處，自斟憔悴。可記對舊河山？指暮虹青塚，落泥征騎。聽枯桐斷梗，怕絲管悲歡慵理。今宵何世？拂劍倚星寒，芸窗餘意。蛩聲碎，鏡闌惟許，翠尊愁未？